

Ciet Fwen Suenggangq Yangduh Cin:

Sing Fwen Haprwenz Hek Daengz Lai

向都镇霜降山歌节：山歌声声引来八方客

□ Vangz Souciz ingj Sinhyungz hoiz



▲ Canghfwen gwnz daiz doiq fwen naemq, vunzlai humx yawj dingq maezmwd.



▲ Bengcag doxdax rem, vunz caez hemq gayyouz.



▲ Canghfwen doiq fwen naemq, mwngz coenz gou dap hot.



▲ Lungz ak nauh gaigeq, vanqce roengz nauhyied.



▲ Saejlwedmou homfeih, vunz doxcaeh cimz gwn.



▲ Gyaepmou doxdax caen mizyinx, gyoengqvunz humx yawj ndaetfwdfwd.



▲ Daem rum ceizndek daih hekviq, ngoenzciet gizgiz cungj angqyangz.



▲ Laeujhaeux get youh hom, vunz doxcomz daeuj cimz.



▲ Saecej nauh diegdangz, hawj hangzhaw dem hoengh.

“Gyoengq hek seiqlengq comz hawfwen, bibi suenggangq sing fwen sep.” Yangduh Cin aen cin miz 5.37 fanh gyauejvunz、Bouxcuengh ciemq baenz 98.6% neix, “ndoj” youq diegbya gya’gi baihsaebaek Denhdwngj Yen, baihsae dep Dwzbauj Yen, baihsaeb lienz Denzdungh Yen, liz yienhsingz 40 lai goengleix gya, hoeng ngoenzciet conzdungj “ciet fwen suenggangq” aen cin gya’gi neix, moix bi ciethaiq suenggangq geizgan cungj hoenghhwd gawjbanh eu fwen、doiq fwen doxdax caeuq foux lungz、lanzgiuz doxdax nem yienj heiq ndawbiengz daengj lai cungj lai yiengh hozdung, yinx baenz geij fanh vunzmbanj caeuq hekyouz daj sei fueng bet baih ganj bae gvaq ciet.

“Ciet fwen suenggangq ciuhgeq miz, vih geiq goenglauz hung Cangznaij; gojsaeh lumj fwen daih cienz daih, beixnuengx caiq eu cienz bak bi.” Hot fwen sepset rwenzred neix dwg canghfwen Yangduh Cin aeu sing fwen daeuj niemhngex haenh-danq gij saeh boux yinghyungz Bouxcuengh Cangznaij fuhyinz caeuq gyoengq beixnuengx dangdieg de daiq bae dingjhoenx vunzdig、dingjeng cauzdingz apbik haenx, caemh dwg aen hoenzgoek ciet mbaenj fuk suenggangq Yangduh. Riuznaeuz, boux Cangznaij fuhyinz vunz ndaw ranz daihdaih lienhgiengz, aenvih ndatheiq aen biengz laepngauq seizhaenx cauzdingz nduknaeuh、vunzvaih danggiengz、doiq rog doiqnyienh、doiq ndaw apbik haenx, gag gyoebcomz “henmbanj dungzmungzvei” dingjhoenx vunzdig, vutmingh cungj hen ranz bauj guek, doeklaeng aenvih vunzdig caeg’ep doxgap humxhoenx cix deng vutmingh, ngoenz de dai haenx, ngamj dwg daengx bi 24 aen ciethaiq ndawde cietsuenggangq. Vih geiq-niemh boux yinghyungz mbwk Bouxcuengh neix, moix bi ciet suenggangq, vunzmbanj dangdieg cungj gag doxiu dwk bae daengz baihnaj aenmoh Cangznaij fuhyinz caeqbaiq, muengh hoenz yinghyungz

dauqma ranzmbanj, mbaenj goeng-mbwn soengq fuk bauj bingzan. Youq ndaw hozdung caeqbaiq sam ngoenz sam hwnz, mbaenj mbauqsau couh eu fwen daeuj lwnh gij cingz siengjniemh bonjfaenh, doeklaeng couh dingh moix bi ciet suenggangq le bungz sam ngoenz ngoenzhaw Yangduh gonq-laeng gungh 9 ngoenz guh “ciet fwen suenggangq”, faen baenz “gangqdaez”、“gangqgyang”、“gangqbyai”, ndawde “gangqgyang” banh ndaej ceih hoenghhwd, nanz le couh baenz ciet fwen suenggangq daegbied neix, riuz daengz seizneix gaenq miz 300 lai bi lizsij.

Ngoenz ciet, dang sing fwen haidaiz “nanz mbouj eu fwen sim humzhaenz, diuzroen mbouj byaij nywjrur hwnj” haprwenz byongh-mbwn Yangduh le, gyonglaz riengzdwk roq yiengj lo, duzlungz saeciej caemh fangienj hwnjdaej, gwnzgai Yangduh yaepyet sing fwen sepset haprwenz、sing gangj sing riu gyukgyad, gwnz daizfwen, gyoengq canghfwen baen doih doiq fwen naemqsadsad mbouj faen sawhingz, hawj vunz dingq dwk maezmwd; dieg giuzcangz doxdax, gyoengqvunz humx yawj foux lungz foux saeciej、dwk lanzgiuz、bengcag daengj diyzuz doxdax, bek fwngz hemq gayyouz, ciengzmienh nauhyied; youq gwnz daizheiq, heiq ndawbiengz vunzmbanj gag bien gag lienh gag yienj haenx daengj vwnzyi biujyienj cit riengz cit hwnjdaiz, gyoengqvunz yawj dwk riengz angq riengz haemz deiheih hemq ndei; youq gwnzgai, gyoengqvunz cet gvaq aen dem aen dan dajgai, cawx huq daegsaek dangdieg, cimz faenjgienjdoengz、ceizcaqyouz, cawx maenz、biek、meggak daengj gigwn fouz goenghah……

“Gan ginz Yangduh lumj ranz ndeu, vwnzmingz lijmau haeuj fanh ranz; saedcej ciemh ndei raeuz haenhdanq, haengrengz hamjyat coh siujgangh……”, muengh gij saedcej vunz Yangduh lumj ndaw fwen eu okdaej haenx nei, ngoenz beij ngoenz ndei, bi beij bi vuenyungz!